

## కొలోస్సియుల్ క రెగిడ్లి ఉత్త్రమ్ బారిక్ జలో పవులు కొలోస్సి పట్టుమ్చ సంగుమ్చక పవులు రెగిడ్లి ఉత్త్రమ్

మొదొల్ కోడు

1 కొలోస్సి పట్టుమ్తెచ క్రిస్తుక నంపజా జోచి నుద్ది జా జోచయ్ జల జోచి తెడి తా నిదానుమ్ జల బావుడ్లుక,

2 దేముడుచి సెలవ్చి రిసా \*క్రిస్తు జలో యేసుచి రిసాచి సుబుమ్ కబుర్ కామ్ కెర్తె రిసా జో దిలి అదికారుమ్ తెన్ జోచొ బారికి జలో ఆవ్ పవులు, బావొ జలో తిమోతి తెన్, రెగిడ్లి ఉత్త్రమ్.

అమ్క అబ్బొ జలో దేముడుచి దయ సేంతుమ్ తుమ్చి ఉప్పిరి తవుసు!

జేవ్ కొలోస్సి పట్టుమ్చచి రిసా పవులు జోవయించి సర్ద సంగ ప్రార్దన కెర్తె తిలిన్చి కోడు

3 తుమ్చి రిసా కెయ ప్రార్దన కెర్తె కి, అమ్చొ ప్రబు జలో యేసుక్రిస్తుచొ అబ్బొన్ జలో దేముడుక తుమ్చి రిసా అమ్చి సర్ద సంగితనుమ్.

4 కిచ్చొక మెలె, జో క్రిస్తు యేసుచి ఉప్పిరి తుమ్ నంపతిలిన్చి రిసా, పడ్డొ జోచయ్ జల నంపజలన ఎత్తిజిన్క తుమ్ ప్రేమ కెర్తెన్చి రిసా, అమ్ సూన అన్నుమ్.

5 పరలోకుమ్తె తుమ్చి రిసా తియ్యె తిలిసి ఆసతె దెకితె తిలి రిసా, తుమ్క పెట్టి తిలి నముకుమ్చి ప్రేమచి, రిసా తుమ్ ఇసి జా అన్నున్. జా ఆసతె దెకితె తిలిన్చి రిసా తుమ్ సత్తిమ్చి †కబుర్తె, మెలె సుబుమ్ కబుర్తె, అగ్గె సూన్లదు.

\* 1:2 1:2 'క్రిస్తు' మెలె, 'తెర్రయిందె' మెన ఎత్తి అదికారుమ్ తిలో దేముడు పూర్ణుమ్ సంగిలో దొర్కు జలో రచ్చించుప కెర్తెసా. † 1:5 1:5 నెంజిలె 'కోడుతె'.

6 నుబుమ్ కబుర్ తుమ్క దొర్కు జా అయ్లి తెంతో, ఎక్కి తుమ్కయ్ దొర్కు జలి మెన నాయ్. ఒండి లోకుమ్తె సూనయ్ జతయ్, చి కేనె సూనయ్ జలెకి, ఆత్మపలితుమ్ జెతయ్. దస్సి, తుమ్ తొలితో సూన ప్రబుచి దయచి వరుమ్చి రిసా పూర్తి అర్దుమ్ కెరన్లి దీసి తెంతో, తుమ్తె కి నుబుమ్ కబుర్ ఆత్మపలితుమ్ జెతయ్.

7 ప్రేమ జలో అమ్చి తెన్ ప్రబుచో సేవ కెర్తొసా జలో ఎవప్రా, జలె, ప్రబుచి ఈంజ నుబుమ్ కబుర్ సరిగా, కిచ్చొ వేరచి నే బెదయ్తె సికడ్డికయ్, పూర్తి అర్దుమ్ కెరన్లదు. అమ్ ఒత్త గెచ్చుక నెతిర్లి రిసా జొయ్యి అమ్చి నావ్ తెన్ మెలి రితి, క్రీస్తుక నిదానుమ్ తిలో సేవ కెర్తొసా జా ఒత్త తుమ్క నుబుమ్ కబుర్ సూనవ సికడ అస్సె.

8 పడ్డో, ప్రబుచి ఆత్మ తుమ్చి పెట్టి దెతి తుమ్చి ప్రేమచి రిసా జో ఎవప్రా అమ్క సంగ అస్సె.

9 జాకయ్, తుమ్చి నముకుమ్చి అన్నె నంపజలసక చి ఉప్పిర్చి తుమ్చి ప్రేమచి రిసా, అమ్ సూన్లి దీసి తెంతో, తుమ్చి రిసా ప్రార్దన కెరుక ములుమ్ నాయ్. ఆత్మచి బుద్ది, ఆత్మతె గ్యానుమ్ ఎత్కి దేముడు తుమ్చి పెట్టి బెరవును, చి అమ్ జోచ మాన్సుల్ జా ఇండుక మెన జోచి ఇస్టుమ్ కిచ్చొ కిచ్చొ జతయ్ గే, తుమ్ పూర్తి జాన్తు మెనయ్ తుమ్చి రిసా ప్రార్దన కెర్తసుమ్.

10 జోచి ఇస్టుమ్ జాన్లె, జోచి బుద్ది గ్యానుమ్ తెన్ తిలె, ప్రబుచి విలువ దెకయ్తి రితి తుమ్ ఇండితె. దస్సి, చెంగిల్ కమొ ఎత్కితె ఇండ పలితుమ్ దెర దెర, అగ్గెచి కంట దేముడుక రోజుక ఒగ్గర్ జాన జాన, జోచి ఇస్టుమ్ రితి ఇండ ఇండ, జోక పూర్తి సర్దనంతోసుమ్ కెర్తె.

11 అన్నె కిచ్చొ మెన అమ్ ప్రార్దన కెర్తసుమ్ మెలె, జోచి పరలోకుమ్చి సెక్తిక తుమ్చి పెట్టి జోచి సెక్తి బెరవ డిట్టుమ్ కెర్ను, చి తుమ్చి పెట్టి జో దెతి సంతోసుమ్క తుమ్ ఎత్కి బాదల్ సేంతుమ్ తెన్ ఓర్నువ జా నిదానుమ్ తా.

12 ఎత్కిక అబ్బొ జలో దేముడుక తుమ్చి సర్ద సంగితె. కిచ్చొక మెలె, జోచయ్ సుద్ది జల మాన్సుల్ ఎత్కిజిన్ తెన్ జోచి ఉజిడ్

రాజిమతెచి సొమ్మారుమ్తె అమ్క వాట సేడ్డి రితి జోవయించి దయక అమ్క విలువ దెక అస్సె.

13 మెలె, సయ్తాన్ ఏలువ కెర్తి అందర్ రాజిమ్ తెంతో అమ్క విడ్డల్ కెర, ప్రేమ తిలో జోచొ సొంత పుత్తున్చి రాజిమ్తె అమ్క జో అబ్బొన్ బెదవ అస్సె.

14 మెలె, జో పుత్తున్తెయి అమ్చి రచ్చన. †అమ్ కెర్ల పాపల్ జొయ్యి చెమించువ కెర, నెతోవ గెల అస్సె.

### ఎత్కిక ఆదారుమ్ జలొసొ యేసుయి

15 యేసుతె అమ్, నే డిస్తా దేముడుచి పొలిక డిస్తయ్. కిజెర్మున్ ఎత్కిక జో తొల్పుర్, జో వెల్లో.

16 కిచ్చొక మెలె, ఎత్కి కి యేసు తెన్ జెర్మున్ జలి. కేనె తిలె కి, పరలోకుమ్తె తిలె కి, బూలోకుమ్తె తిలె కి, కేన్ లోకుమ్తె తిలె కి, నే డిస్తిసి జలెకి, డిస్తిసి జలెకి, కేన్ లోకుమ్చ సిజ్జాననల్తె తిలన కి, ఏలువ కెర్తి నెక్తి అదికారుమ్ తిలన కి, అదికారుమ్ తిలిసి ఎత్కి, అదికారుల్ ఎత్కి, పరలోకుమ్చ జలెకి, బూలోకుమ్చ జలెకి, ఎత్కి కి జోచి అత్తి జెర్మయ్ జలి. జోచి రిసొయి జెర్మయ్ జలి.

17 \*ఎత్కిచి కంట తొలితో తిలో నుదొ జొయ్యి, ఎత్కిక ఆదారుమ్ జలొసొ జొయ్యి. జో నెంజిలె, జేవ్ తత్త నాయ్.

18 పడ్డె, జోచి †ఆగ్ జల నంపజలన బెదితిన్ మొత్తుమ్క జో బోడి, జో మొదొల్. మొర్నుక జిన జితనక జో తొల్పుర్. కిచ్చొక మెలె, కిచ్చొచి రిసొ కి జో వెల్లో తంక.

19 క్రీస్తుచి పెట్టి పూర్తి తంక మెన, దేముడుచి ఇస్టుమ్ జలి.

‡ 1:14 1:14 ఈంజ ఉత్తుమ్ తొలితో రెగిడ్ల సగుమ్ పుస్తకల్తె కిచ్చొ అస్సె మెలె, జోచి లొయి నువ, అమ్క నెతోవ గెల అస్సె, మెలె, అమ్చి పాపుమ్ చెమించువ కెర అస్సె.

§ 1:15 1:15 నెంజిలె, 'జెర్మయ్లిసి ఎత్కిక'. గని జెర్మయ్లిసి జయె నాయ్, జో. దేముడి జా జో ఎత్కిచి కంట అగ్గయ్ తిలో. యోహాను 1:1-2, 14. \* 1:17 1:17 'తొలితోవ' మెలె, జో తొలితో తెంతో అస్సె, చి జొయ్యి ముక్కిమ్చొ. † 1:18 1:18 ఎపెసు 1:22-23, 4:16.

20 పడ్డో యేసుక్రీస్తు సిలువతె అర్చితమ్ జా జోచి లోయి సువిలి వాటు పాపుమ్ పుంచితిన్చి సెక్తిక †బూలోకుమ్తె తిలిసి ఎత్కి, పరలోకుమ్తె తిలిసి ఎత్కి, కేన్ లోకుమ్తె తిలిసి ఎత్కి క్రీస్తుచి తెడి జేవ్ ఎత్కి జో తెన్ కీసేంతుమ్ జతి రితి అన్నె బెదవనుక మెన దేముడుచి సర్ల జలి.

### యేసుచి అత్తి దేముడు బెదవన్లన

21 తుమ్ కొలోస్సియుల్కి అగ్గె జోక వేరయ్ మాన్సుల్ జా, తుమ్చ అత్తల్తె జోక విరోదుమ్ జా తిలి రిసా వెర్రి వెర్రి కమొ కెర్తె తిలదు.

22 గని, జోచి ఆగ్ మొర్లిన్ తెన్ తుమ్చి పాపుమ్ వయ తుమ్క కి జో బెదవన అస్సె. కిచ్చొక మెలె, తుమ్ జోచి సుద్ది జా, జోచయ్ జా, తప్పు నెంతె, కిచ్చొ గర్చికి నెంతె జా, దేముడు అబ్బొన్చి మొక్కె జో తుమ్క టీచొ కెరెదె.

23 గని జా జర్లు జంక మెలె, తుమ్ అత్తక డిట్టుమ్ జా జొయ్యి పునాది జతినతె టీచ, \*‘పరలోకుమ్తె గెతి వాటు అమ్క దొర్కు జలి’ మెంతి దయిరిమ్ దెతి తుమ్ సూన్లి సుబుమ్ కబుర్ నే ముల్తె అన్మానుమ్ నే జతె, వేరతె నే గెతె, ప్రబుచి ఉప్పిర్చి నముకుమ్ తుమ్ నిదానుమ్ తంక. జెర్మయ్లిసి ఎత్కిక ఈంజ సుబుమ్ కబుర్ ఈంజ ఒండి లోకుమ్తె సూనయ్ జా అస్సె. ఆవ్ పవులు కి ఈంజ సుబుమ్ కబుర్ సూనయ్తి రిసా, ప్రబుచొ సేవ కెర్తొసా జా అస్సె.

24 ఆవ్ జలె, ‘తుమ్క లాబుమ్ దొర్కు జవున్’ మెన ఆవ్ †అల్లర్ సేడ్లె కి, అంక సర్ల. కిచ్చొక మెలె, ఆవ్ ఇన అల్లర్ సేడ్లిసి కీసి జతయ్ మెలె, క్రీస్తు సేడ్లె అల్లర్తె ఆవ్ బెద ఒత్త సేంసిలిసి ఆవ్ ఓర్పుప జా కుట్టయ్లి రితి జతయ్. కిచ్చొక మెలె, జోచి ఆగ్ జల జోచయ్ సంగుమ్క ‘జోచి కబుర్ సూన్తు’ మెనయ్, ఆవ్ ఈంజేవ్ నైమల్ సేడ్లెసి.

‡ 1:20 1:20 రోమీయుల్ 8:20-23. § 1:20 1:20 ఎఫెసొ 1:9-10. \* 1:23 1:23 27వ కొడు, చి 1:5వ కొడు దెక. † 1:24 1:24 జోజేలి జా తిలన్. 4:3, 10 దెక.

25 జోచయ్ జల మాన్సుల్ మొత్తమ్క ఆవ్ ఈంజ †సేవ కెర్తి రిసా ప్రబు అంక తెద్రవ అస్సె. దస్సి, తుమ్చి రిసా కి, అంచి కోడు పూర్తి తుమ్ జానుక మెనయ్, జొయ్యి అంక తెద్రవ అస్సె.

26 జా కోడు కిచ్చొ జయెదె మెలె, ఉగల్చి ఉప్పిరి ఉగల్చ మాన్సుల్ నే నూన్తి రితి జో కీలుంకడ తిలి గుట్టు. జా అగ్గె లుంకడ తిలె కి, అప్పెయి జోక నంపజల జోచయ్ జల మాన్సుల్క జో నూనవ అస్సె.

27 తుమ్తె తెద్రయిందె మెన యూదుల్క దేముడు సంగ తిలో దొర్కు. జలో రచ్చించువ కెర్తొసా జలో క్రిస్తు, ఉజిడ్ తిలి గవురుమ్చి ఆన తుమ్ యూదుల్ నెంజిలనచి పెట్టి కి అస్సె. పరలోకుమ్తె గెతి వరుమ్చి దయిరిమ్ తుమ్కయ్ కి దొర్కు కెర అస్సె. జయ్యి కోడు జోచి గుట్టు జా తిలి. జా రచ్చన కెత్తిజిన్ యూదుల్ నెంజిలనక కెద్ది సామ్నారుమ్ కెర్తయ్! కెద్ది వెల్లి కోడు, ఈంజ. జయ్యి గుట్టు జోచయ్ జల మాన్సుల్కయ్ జో జానవుక ఇస్తుమ్ జలో!

28 జలె, ఆకర్క తీర్పు జంక మెన ఎత్కిజిన్ దేముడుచి మొక్కె టీవో కెరుక మెన, క్రిస్తుక నంపజల మాన్సుల్ ఆత్మ తెన్ పూర్తి వడ్డిల మెలె, జోవయింతె ఎత్కి. మాన్సు పూర్తి జా జోవయించి మొక్కె టీవో జలె, అమ్ జోవయింక బవుమానుమ్ దిలి రితి జయెదె. జాకయ్, \*‘ఆత్మ తెన్ పూర్తి వడ్డుతు’ మెనయ్, క్రిస్తుచి రిసా బాల వెల్లిో ఎత్కిజిన్క అమ్ నూనయ్తె తా, వేర బుద్దివొచి రిసా జాగర్త సంగితసుమ్, జోచి రిసాచి గ్యానుమ్ ఎత్కి జోవయింక సికడ్తసుమ్.

29 జోక ఆత్మక పూర్తి వడ్డుత్! మెనయ్, అంచి పెట్టి జో మొచ్చు తెన్ దెతి జోచి ఎదివాట్ సెక్తి ఎత్కి తెన్ని, పూర్తి మెన్సు దా, జోచి కామ్ ఆవ్ కెర్తె తత్తని.

## 2

1 తుమ్చి రిసా కి, లవొదికయ పట్టుమ్చ నంపజలనచి రిసా కి, అన్నె, అంక నే దెకిల అన్నె నంపజలనక ఎత్కిజిన్చి రిసా కి, ‘ఆత్మతె

‡ 1:25 1:25 ఎవెసు 3:1-13. § 1:26 1:26 ఎవెసు 1:9, 3:3-4. \* 1:28 1:28 ఎవెసు 4:12-14.

వడ్డుతో' మెన ఆవ్ కెద్ది ఆస తెన్ ఉచర్తసి గే ప్రార్దన కెర్తసి గే తుమ్ జానుక మెన అంచి ఆస.

2 తుమ్ జేవ్ ఎత్కిజిన్చి రిసా ఆవ్ కిచ్చొ మెన ఆస జతసి మెలె, జేవ్ ఎత్కిజిన్ మొత్తుమ్ ఎక్కి ప్రేమ ఎక్కి కట్టు జా జోవయించి పెట్టి దయిరిమ్ డిట్టుమ్ జతు, చి జోవయింక పూర్తి అర్దుమ్ జెయెదె, చి క్రీస్తుచి తెడి అస్సుమ్చి చెంగిల్ తమ్దె మెన పూర్తి దయిరిమ్ జవుల, చి దేముడుచి గుట్టు జానుల, మెలె క్రీస్తుకయ్ జానుల మెన తుమ్చి రిసా ఆవ్ ఆస జతసి.

3 జో క్రీస్తుచి పెట్టి బుద్ది గ్యానుమ్చి సొమ్సారుమ్ ఎత్కి ఒత్తయ్ లుంకిల్ రితి అస్సె.

4 తుమ్క కిచ్చొక ఆవ్ ఇసి సంగితసి మెలె, సూటి డీస్త తెలివి కొడొ తెన్ కా తుమ్క మోసిమ్ నే కెర్తి రితి తుమ్ జాగర్త తా.

5 ఆగ్క మెలె, ఆవ్ తుమ్క దూరి అస్సి, గసి ఆత్మక తుమ్చి పాసి తా, తుమ్ అప్పె సుద్ది ఇండితిసి, క్రీస్తుచి ఉప్పిర్చి తుమ్చి నముకుమ్ డిట్టుమ్ తిలిన్చి రిసా ఆవ్ సూన్లి రిసా, సర్ల తెన్ అస్సి.

6 జలె, ప్రబు జలొ క్రీస్తు యేసుక తుమ్ నంపజా తిలదు.

7 జలె, జోచితె \*చెర్రో గల డిట్టుమ్ టీవొ జా తిలి రితి, చెంగిల్ గేర్ జా తంక మెన కిసి డిట్టుమ్ పునాదితె జా తంక ముక్కిమ్ మెలె, దస్సి, జో క్రీస్తు పునాది జతిన్చి ఉప్పిరి తుమ్ టీవొ డిట్టుమ్ జా, చి జోచి తెడి ఆత్మతె వడ్డ, క్రీస్తుచి ఉప్పిర్చి నముకుమ్చి రిసా ఎపప్రా తుమ్క సికడ్లిసి ఎత్కి దెరన, అన్నె డిట్టుమ్ జతె తా. జో ప్రబు కెర్లి దయ ఎత్కిచి రిసా జోక తుమ్చి సర్ల దెకయ్తె తా, జోచి తెడి జియ జో దెతి బుద్దితె తుమ్ ఇండ.

8 తెలివి తెన్ కొడొ బెదవ వేర బోదన కెర్తిసి తెన్ రితయ్ కొడొ తెన్ మాన్సుల్ అద్వి ఉచర్ల అలవాట్ కమొ, †ఆగ్గుల్క, ఆత్మల్క, దూతల్క బూతల్క, బిత అలవాట్ కమొ మాన్సుల్ సికడ తుమ్క

\* 2:7 2:7 ఎపెస 3:17 దెక. † 2:8 2:8 నెంజెలె, 'బాలబోదల్ అర్దుమ్ కెరంతి ఎదిలి గ్యానుమ్చ సెన్జలు'.

మోసిమ్ కెరుక ఉచరుల. దసితె తుమ్ దెర్ను నే నేడ్డి రితి తుమ్ జాగర్త తా. జా క్రీస్తు సికడ్డిసి నెంజె ఈంజ లోకుమ్తె బెదితిసి.

9 దేముడు కిచ్చో నే పిట్టె, జొయ్యి పూర్తి ఆగ్గే రూపుమ్ తెన్ క్రీస్తుచి పెట్టి జితయ్.

10 చి †అదికారుమ్ తిలిన్ ఎత్తిచి ఉప్పిరి, కీఅదికారుల్ ఎత్తిచి ఉప్పిరి తిలో క్రీస్తుచి తెడి తుమ్ ఆత్మక పూర్తి దా అస్సున్.

11 పూర్గుమ్చి అలవాట్ తెన్ అమ్చ యూదుల్ 'దేముడుచ మాన్సుల్ ఆము' మెనన, జోచి సుద్ది కారిమ్చి సున్నతి కెరనుల. జా, జలె, ఎక్కి అగి జర్గు జతిసి. తూమ్, మాత్రుమ్, అప్పె క్రీస్తుచి తెడి కిసి జా అస్సున్ మెలె, క్రీస్తుచి తెడి సుద్ది కెర్తి సున్నతి కెరన్లి రితి జా అస్సున్. మాన్సు అగి కెరన్లి సున్నతి నెంజె, గని ఈంజ ఆగ్గేచ ఆసల్ బుద్దుల్ సింద వెంట గెలిసి.

12 క్రీస్తు మొర్లిన్ తెన్ తుమ్చి ఈంజ ఆగ్గేచ ఆసల్చి జీవ్ మొర గెలన్, ఈంజ ఆత్మజీవ్ తుమ్క కిసి దొర్కు జలి మెలె, క్రీస్తుక మొర్తన తెంతో జియడ్లొ దేముడుక సెక్తిక తుమ్ నంపజలదు. చి జో అన్నె జీవ్ జా ఉట్టిన్ తెన్ జోచి ఆత్మక తుమ్ ఆత్మజీవ్ జా ఉట్టదు. ఇన్నెచి గుర్తుక బాప్తిసుమ్ నజన్లదు.

13 పడ్డొ, తుమ్ పాపుమ్ కెరై తా అగ్గె ఆత్మక మొర్తనయ్ జా తిలదు, ఆగ్గేక యూదుల్చి సుద్ది సున్నతి నెంతె తిలదు, తుమ్ దస్సి మొర్తనయ్ జా తతికయ్, దేముడు అబ్బొసి క్రీస్తుక అన్నె జియడ, జో తెన్ కి తుమ్క జియడ్లన్. కిసి మెలె, జోక నంపజల ఎత్తిజిన్చ పాపల్ ఎత్తి అమ్క చెమించుప కెర్లన్.

14 మెలె, పూర్గుమ్ తెంతోచ ఆగ్గుల్ అమ్చి ఉప్పిరి దావ రెగిడ్లి రితి జితయ్. గని, జా ఆగ్గుల్చ నిందల్ ఎత్తి జో దేముడు అబ్బొసి వుంచ

† 2:10 2:10 ఆత్మల్, దూతల్, బూతల్చి అర్దుమ్ కి ఈంజీవ్ కొడొతె ఉచరుక జయెదె. కొలోస్సియల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్తిక బితె తిల.

§ 2:10 2:10 ఆత్మల్, దూతల్, బూతల్చి అర్దుమ్ కి ఈంజీవ్ కొడొతె ఉచరుక జయెదె. కొలోస్సియల్ క్రీస్తుక నే నంపజతె అగ్గె, ఆత్మల్ దూతల్ బూతల్ ఎత్తిక బితె తిల.

గెలన్. కీసి మెలె, క్రీస్తు మొర్లి సిలువతె జా ఆగ్గుల్క మేకుల్ తెన్ పెట ముల దిలి రితి వుంచ గెలన్.

15 దస్సి కెర, దస ఆగ్గుల్చ నిందల్చ కోడ్లు వయడ్డ అమ్క పాపుమ్ సికడ్ల ఆత్మల్, దూతల్, బూతల్, గట్టచి సెక్తి పాడ్ కెర గెల కెర, ఎత్తిచి మొక్కె జోవయింక లాజ్ కెరవ, క్రీస్తు జోవయించి ఉప్పిరి జిన్లన్. అమ్ క్రీస్తుక నంపజలసచి ఉప్పిరి దసచక కి కిచ్చొ సెక్తి నాయ్.

16 జాకయ్, కతిసిచి రిసా పితిసిచి రిసా 'ఈంజ గార్, జా గార్' మెన జవున్, నెంజిలె, 'పండుగు దీసి, ఆమన్ దీన్చి రిసా, నెంజిలె బక్తి కెర్తి సెలవ్ కడల్లి దీసి రిసా, కిచ్చొ కిచ్చొ కెర్లె గార్' మెన తుమ్క కో సంగుత్ అవ్కాసుమ్ దాస నాయ్, సికడ్ల నూన నాయ్.

17 పడ్డొ జర్గు జతిన్క దసచ ఎత్తి ఎక్కి నీడ. జా నీడ గల్తాసా క్రీస్తు.

18 జాకయ్, "చువ్వె తా దూతల్ గట్టక తుమ్ జొకర" మెన కో సికడ్లె, తుమ్ దెర్ను సేడ నాయ్. "దసచక నే జొకరె కిచ్చొగె పిట్టెద" మెన బియడ్లసక తుమ్ బియఁ నాయ్. దస కమొ సికడ్లెసా కో జలెకు కిచ్చొక నంప కెర్తయ్ మెలె, రిత సిప్పల్క, దస్సి జోచి సొంత మెన్సు తిలిన్క 'వెల్లిచి' మెన వుల.

19 క్రీస్తుక, మెలె బోడిక, జో మాన్సు అజ జా ముల అస్సె. జో బోడి తెన్ బెద తిలెకయ్ ఆఁగక పుస్తి తా, అత్కుల్ నరల్ ఎత్తి తమ్మన కట్టు తెన్ తా, దేముడు దెతి జివుకయ్ వడ్డితె తయెదె.

20 క్రీస్తు తెన్ తుమ్ బెద, జో మొర్లిన్ తెన్ బెదిల్ రితి జా, తుమ్చి ఈంజ లోకుమ్చి పాపుమ్చి మొర్లి ఆత్మ మొర, \*మాయలోకుమ్చ బూతల్, దూతల్, ఆత్మల్, గట్టచి సేవ కెరుక ముల విడ్డల్ జలదు జలె, కిచ్చొక జా పాపుమ్చి ఆత్మ తెన్ అప్పెక తిలి రితి ఇండితను?

21 మెలె, మాన్సుల్ వాడిక కెర కేడయ్త రిత ఆగ్గుల్చి రిసా, అలవాట్చ కమొచి రిసా 'దెరుక గారు, కంక గారు' నెంజిలె, 'చడుక గారు' మెల వెర్రి ఆగ్గుల్క కిచ్చొక బితను?

22 దసచ ఒండి మాన్సుల్ ఆరి ఉచర సికయ్లిసి.

\* 2:20 2:20 నెంజిలె, 'బాలబోదల్చి ఎదిలి గ్యానుమ్చి అలవాట్ ముల....'



23 మాన్యుల్ అవ్వె కెర్ల దస జాడ్లు రిత వయనై, సిచ్చల్ కెరనై, ఆగ్గక సిచ్చల్ కెరనై, గ్యానుమ్ రితి పున్నిమ్ రితి డీసెదె, గని అమ్చి పట్టిచి పాపుమ్బుద్దిచ ఆసల్క దస ఆగ్గుల్ ముద్దో కెరుక నెతిరి, గెచ్చువుక నెతిర్తి.

### 3

#### పరలోకుమ్ తిలిస్క ఆస జంక

1 క్రీస్తు తెన్ తుమ్ బెద జో తెన్ జీవ్ జా ఉట్ట, జోచి ఆత్మతె తుమ్ జీవ్ జలదు. జలె, జో జీవ్ జా ఉట్ట, ఉప్పిరి, దేముడు అబ్బొన్చి ఉజెతో పక్క పరలోకుమ్తె వెస అస్సె. జాకయ్, జో ఉప్పిర్ వెస తిలిస్కతెచి ఎత్తిక తుమ్ ఆస జా.

2 ఈంజ లోకుమ్తె తిలిస్క ఆస జా నాయ్. పరలోకుమ్చిక ఆస జా.

3 కిచ్చొక మెలె, ఈంజ లోకుమ్తె తుమ్ మొరయి అస్సున్, చి దేముడుచి తెడి క్రీస్తుతెయ్ తుమ్చి జీవు క్రీస్తుతె దేముడుచి తెడి లుంకడ అస్సె.

4 అమ్చి జీవు తిలొ క్రీస్తు కెయగ అన్నె ఉత్త్ర జా డీసెదె గే, తుమ్ కి తెదొడక జో తెన్ పరలోకుమ్చి గవురుమ్ తెన్ జతిన్తె డీస్తె.

5 జాకయ్, తుమ్చి పెట్టి ఈంజ లోకుమ్చి బుద్దిచి కిచ్చొ జలెకు తయెదె గే, జాక తుమ్ గెచ్చవ గెల; జాక మార. కీస బుద్దివొ మెలె, లంజెకమొ, లంజెబుద్ది, ఆగ్గచి ఆస ముద్దో నే కెరంతిసి, గార్చిచి ఉప్పిర్చి ఆస, పడ్డో అన్నె మాన్యుల్చి ఆస్తి దొర్కు కెరంతి ఆస; ఇసిచి జలె, సత్తిమ్ తిలొ దేముడుక ముల వేర దేముడ్లు మెలొసొక ప్రేమ కెర్లి రితి జతయ్, జాక 'దేముడు' మెలి రితి కెర్లి బొమ్మక జొబర కెర్లి రితి జతయ్.

6 దస కమొచి రిసా \*జోచి కోడు రితి కెరుక నెసిల మాన్యుల్క దేముడుచి కోపుమ్చి సిచ్చ లయెదె.

\* 3:6 3:6 'జోవయింబి' తెంతో 'మాన్యుల్క' ఎదచి కోడు ఈంజ ఉత్త్రమ్ తొలితో రెగిడ్ల సగుమ్ పుస్తకల్తె తయె నాయ్.

7 అగ్గె తుమ్ జేవ్చి నెడమె జితి పొది దనచ ఎత్కి కెర ఇండితె తిలదు.

8 గని అప్పె దనచ ఎత్కి కి తుమ్క దూరి కెర. కీనచ మెలె, కోపుమ్ దెకయ్తిసి, కోపుమ్ దెరన్తిసి, కుస్సిదుమ్, దూసినల్, వెట్కారుమ్చ కొణ్ణె.

9 పణ్ణె, ఎక్కిలోక ఎక్కిలో అబద్దుమ్ సంగ నాయ్, కెర నాయ్. కిచ్చొక మెలె ఈంజ లోకుమ్చి పాడ్ జలి ఆగ్చి జెర్మున్ ఇండితిసి కడ వెంట గెల కెర,

10 తుమ్ జేవ్చి ముల, నొవి మాన్సుక గలన అస్సున్. ఈంజ గ్యాసుమ్ తెన్ జా జెర్మయ్లో దేముడుచి రూపుమ్ తెన్ నొవి బుద్ది దెరన అస్సున్.

11 ఈంజ నొవి ఆత్మతె జెర్మున్ జల మాన్సుల్తె కిచ్చొ తేడల్ నాయ్. 'గ్రీసు దేసిమ్చ' మెన దేముడు సంగె నాయ్, 'యూదుల్' మెన నాయ్. 'యూదుల్చి గుర్తుచి సున్నతిచ' మెనె నాయ్, 'జా సున్నతిచ గుర్తు నెంజిలన' మెనె నాయ్, 'నేన్ల మాన్సుల్' మెనె నాయ్, 'ణెంగుర్ దేసిమ్చ' మెనె నాయ్, 'గొతిమాన్సుల్' మెనె నాయ్, 'గొతి నెంజిలన' మెనె నాయ్. జోచి మొక్కె దన తేడల్ నాయ్, గని ఎత్కిజిన్క క్రీస్తుయి ముక్కిమ్, అన్నె కేన్ రగుమ్చ మాన్సుల్ జలెకి, జోచ మాన్సుల్ ఎత్కిజిన్చి పెట్టి జో అస్సె.

12 జలె, దేముడు నిసాన్ల తుమ్ జోచయ్ సుద్ది జల జో ప్రేమ కెర్లన, తుమ్ ఎత్కిజిన్ కిచ్చొ కిచ్చొ బుద్దివొ గలన మెలె, కన్కారుమ్ దెకితిసి, మెత్తన తతిసి, గవురుమ్ నే ఉచరంతె, అన్నె మాన్సుల్క మరియాద దెకితిసి, సేంతుమ్ తెన్ బాదల్ ఓర్పువ జా

13 ఎక్కిలోక ఎక్కిలో ఓర్పువ జతిసి. పణ్ణె, కిచ్చొ జవున్ తప్పుచి రిసా ఎక్కిలో అన్నెక్లొక నింద కెరుక జతి జలె, చెమించువ కెర. ప్రబు తుమ్క కీసి చెమించువ కెర అస్సె గే, తూమ్ కి ఎక్కిలోక ఎక్కిలో చెమించువ కెరుక అస్సె.

14 ఎత్కిచి కంట ముక్కిమ్క తుమ్ కిచ్చొ బుద్ది గలన మెలె, ప్రేమయ్. కిచ్చొక మెలె, ఎత్కి ఎక్కి కట్టు తెన్ తతి రిసా ప్రేమ

ఆదారుమ్ జతయ్, జయ్యి బెదవెదె.

15 పడ్డొ, క్రీస్తు దెతి సేంతుమ్ తుమ్చి పెట్టి ఏలుప కెర్లి రిసా వాట్ దాస. ఎక్కిలో తెన్ ఎక్కిలో సేంతుమ్ తత్తి రిసాయి జోచి ఎక్కి ఆగ్తె తుమ్ బెదుక మెన జో బుకార్లన్. పడ్డొ, జో కెర్లి దయచి రిసా జోక తుమ్చి సర్ల తుమ్ దెకవ.

16 పడ్డొ, క్రీస్తుచ కొడొ తుమ్చి పెట్టి బస జా కామ్ కెర్తె తతి రితి తుమ్ టాన్ దాస, చి జో దెతి బుద్ది తెన్ నిదానుమ్ తెన్ ఎక్కిలోక ఎక్కిలో జోచి సత్తిమ్ సికడ్డె తా. తుమ్తె కో పొరపాట్ నే జతి రితి బుద్ది సంగ జాగర్ల సంగితె తా, చి దేముడు కెర్లి దయ ఎత్కిచి రిసా తుమ్చి సర్ల జోక దెకయ్తి రితి, జోచి గవురుమ్ సంగిత గనుమ్లు గాయితె తా. జేవ్ గనుమ్లుతె కిచ్చొ ఏక్ రగుమ్ తుమ్ గాయ మెలె, కీర్తనల్ గట్ర.

17 తుమ్ కిచ్చొ లట్టబుక జలెకి, కిచ్చొ కెరుక జలెకి, ప్రబు జలో యేసుచి నావ్ తెడి లట్టబ జవున్, జర్గు కెర జవున్, చి జోచి నావ్ తెన్ దేముడు జలో జోచొ అబ్బొన్క తుమ్చి సర్ల తుమ్ సంగ.

### కేన్ గేరుచ జలెకి ఎక్కిలోక ఎక్కిలో దెకితిసి

18 తేర్బోదలు, జలె, తుమ్చ మున్నర్లుచి తెడి దాక్ కెరన, జోవయిచి కోడు సూన్తె తా. ప్రబుచి తెడి అస్సున్చి ఇసి కెర్లె సూటి, †

19 మున్నర్లులు, జలె, తెర్లివొక ప్రేమ కెర, జోవయింక కుస్సిదుమ్ దెక నాయ్.

20 బోదల్ జలె, కేన్ కామ్చి రిసా జలెకి, అయ్యున్అబ్బొన్చి కోడు సూన. 'దస్సి కెర్లెకయ్ తుమ్క చెంగిలి' మెన ప్రబుచి కోడు.

21 తుమ్ అబ్బుదింసి ఆరి తుమ్చ బోదల్క కోపుమ్ కెరవ నాయ్, నెంజిలె అన్మానుమ్ జా సిక్కు జవుల.

22 గొతిమాన్సుల్ జలె, కేన్ కామ్చి రిసా కి, ఈంజ లోకుమ్చ తుమ్చ ఎజొమాన్లుచి కోడు సూన, జేవ్ సంగిల్ రితి కెర. ఆరి డీసుక,

† 3:18 3:18 మెలె, ప్రబుచి తెడి అస్సి, చి మున్నర్లుల్క గవురుమ్ దెకిలె, ప్రబుక గవురుమ్ దెకిల్ రితి జయెదె. కొరిందల్క రెగిడ్డి ఏక్ నంబర్ ఉత్తమ్ 11:3, ఎపెసు 5:22-24.

మాన్యుల్క మెన్సు వడంతి రిసా నాయ్, గని ఎక్కి మెన్సు ప్రబుకయ్ గవురుమ్ కెర్తి రితి తుమ్చ ఎజొమాన్లుక నిదానుమ్ సేవ కెర.

23 కేన్ కామ్ కెరుక మెలె కి, ఎక్కి మాన్సుచి సేవ కెర్తి రితి పొన, గని ప్రబుచి సేవ కెర్తి బుద్ది తెన్ని, సర్ల తెన్ కెర.

24 కిచ్చొక మెలె, తుమ్ నిదానుమ్ కెర్లి రిసాచి బావుమానుమ్క ప్రబు సొంత జోచి రాజిమ్తె వాటల్ తుమ్క దెయెదె మెన జాన్సు, గెద. దస్సి నిదానుమ్ కెర్తిసి జలె, ప్రబు జలో క్రీస్తుచి సేవ కెర్తిసి జయెదె.

25 కో పాపుమ్ కెర్లె, జోచి సిచ్చ జోక లయెదె. జో దాక్ జలెకి, వెల్లో జలెకి, అన్సె, సిచ్చ దెతిన్తె కి దేముడు కక్క మొకమాటుమ్ దెకె నాయ్, ఎజొమాన్లుక చి గొతిమాన్యుల్క జవున్ తేడల్ దెకె నాయ్.

## 4

### ‘ప్రార్థన కెర్తె తా’

1 ఎజొమాన్లు, తుమ్చ గొతిమాన్యుల్క సరిగా చెంగిల్ దెకితె తా, జోవయింక దెతిసి దాస. తుమ్క కి పరలోకుమ్తె ఎజొమాని అస్సె.

2 నిదానుమ్ తెన్ బద్దుకుమ్ నే జతె దేముడుచి దయ ఎత్కిచి రిసా జోవయింక తుమ్చి సర్ల సంగ ప్రార్థన కెర్తె తా.

3 అమ్చి రిసా కి ప్రార్థన కెర. కిచ్చొక మెలె, అమ్ కీసి గే జోవయించి సుబుమ్ కబుర్ కోడు, మెలె క్రీస్తుచి రిసాచి \*గుట్టు, అమ్ సూనయ్తె తతి రిసా, జో అమ్క వాట్ దెవుసు మెన ప్రార్థన కెర. జా సుబుమ్ కబుర్ జా గుట్టు ఆవ్ సూనయ్లి రిసా ఆవ్ †జేలి జా అస్సి.

\* **4:3** 4:3 ‘క్రీస్తుచి రిసాచి గుట్టు’ మెన సంగిలె, క్రీస్తు రచ్చించువ కెర్లెసా జలిన్చి రిసా సంగితయ్, కొలోస్సియులు 2:2. నెంజిలె క్రీస్తుతెచి రచ్చన యూదుల్ నెంజిలనక కి దొర్కు. జలిన్చి రిసా సంగితయ్, కొలోస్సియులు 1:26-27, ఎపెసు 3:3-6. నెంజిలె ఎత్కి కి క్రీస్తుచి తెడి ఎత్కి అదికారుమ్ తిలో దేముడు బెదవంతిన్చి రిసా, ఎపెసు 1:9-10. † **4:3** 4:3 రోమ్ పట్టుమ్తె జో జేలి జా తిలి పొది ఈంజ ఉత్తుమ్ పవులు రెగిడ్లె. మెన ఒగ్గర్జిన్ ఉచర్తతి. బారికుల్ 28:16, 30, 31 దెక. కైసరియతె కి జేలి జా తిలో; బారికుల్ 23:25, పిలిప్పీతె కి; బారికుల్ 16:23, చి యెరూసలేమ్తె; బారికుల్ 21:33. ఎపెసుతె కి మెన సగుమ్జిన్ ఉచర్తతి, గని రుజ్జు నాయ్. పిలిప్పీతె చి యెరూసలేమ్తె జేలి జలిసి తొక్కి దీసల్చి.

4 జా సుబుమ్ కబుర్ జా గుట్టు అన్నె నూనవుక అస్సె, చి ఆవ్ కీసి సంగిలె సొస్టుమ్ జయెదె గే జో అంక సికడ్సు మెన తుమ్ ప్రార్దన కెర.

### మరియాద తెన్ ఇండ, లట్టబా

5 తుమ్క దిలి సమయుమ్ పాడ్ నే కెరంతి రితి, దేముడుచి క్రిస్తుచి గవురుమ్ దెకయ్త అవ్కాసుమ్ గెనన్లి రితి, వేర మాన్సుల్క తుమ్ మరియాద దెకితె తా.

6 తుమ్ లట్టబ్బిసి సూటి తవున్. బమ్మ తెన్ లట్టబా నాయ్, గని సరిగా ఉచర, చెంగిల్ బెదవ, కామ్క జెతిసి లట్టబ, చి కక్క కిచ్చొ జబాబ్ దెంక గే, అజ్జ తయెదె.

7 ఆవ్ ఇన్నె కీస్ అస్సి గే, తుకికు తుమ్క జానయెదె. ప్రబుచి తెడి అమ్క జో ప్రేమ జలో బావో జయెదె, చి నిదానుమ్ సేవ కెర్తొసా జా, అమ్చి తెన్ ప్రబుచొ గొతిమాన్సు రితో జో జయెదె.

8 తుమ్తె ఆవ్ జోక కిచ్చొక తెద్రవ అస్సి మెలె, ఇన్నె అమ్ కీసి అస్సుమ్ గే తుమ్క జో ఒత్త సంగితి రిసా, చి తుమ్క మెన్సుతె జో దయిరిమ్ కెర్తి రిసా,

9 పడ్డొ, నిదానుమ్ తిలో ప్రేమ తిలో బావో జలో తుమ్చొ సొంత మాన్సు ఒనేసిముక కి తెద్రయ్తసి. ఇన్నె జర్గు జలిసి ఎత్తి తుమ్క జేవ్ దొగుల సంగుల.

### పవులు తెన్ తిలసచి ప్రేమ సంగ తెద్రయ్లిసి

10 ఇన్నె కో కో తుమ్క జోవయించి ప్రేమ సంగ తెద్రయ్తతి మెలె, అంచి తెన్ †జేలితె తిలో అరిస్తార్కుక, పడ్డొ బర్బబాచొ సల్లొసి మార్కు ఇన్నెచి రిసా అగ్గె తుమ్క కబుర్ తెద్రవ అస్సి. జో తుమ్తె అయ్లె, టాన్ దాస.

11 పడ్డొ యూస్తు మెన అన్నెక్ నావ్ తిలో యేసు మెలొసా కి జోచి ప్రేమ తుమ్క సంగ తెద్రయ్తయ్. దేముడుచి రాజిమ్చి రిసాచి

† 4:10 4:10 జో అరిస్తార్కుక నిజామి జేలి జా తిలో గే ఎక్కి జో పవులు తెన్ బెద జా బాద ఒర్బుప జలి రిసా దస్సి మెన్తయ్ గే నేనుమ్.

సుబుమ్ కబుర్ కామ్ ఆవ్ కెర్తినె, ఎక్కి ఈంజేవ్ తీగ్గయ్ యూదుల్ బెద అస్తి. ఈంజేవ్ అంక ఒగ్గర్ తోడు జా అస్తి.

12 పడ్డో, క్రీస్తు జలో కీయేసుక సేవ కెర్తొసా జలో తుమ్చో సొంత మాన్సు ఎపప్రా కి తుమ్క జోచి ప్రేమ సంగ తెద్రయ్తయ్. తుమ్క 'ఆత్మక పూర్తి వడ్డ డిట్టుమ్ టీవ, పూర్తి దయిరిమ్ తెన్ ప్రబుచి ఇస్తుమ్ రితి ఇండితె తత్తు' మెన, తుమ్చి రిసా కెర్దొడ్ తెదొడి జో ప్రార్దన కెర్తొ తత్తయ్.

13 జోచి రిసా ఆవ్ కిచ్చొ సాచి సంగితసి మెలె, తుమ్చి రిసా కి, లవొదికయ పట్టుమ్చచి రిసా కి, చి హియోరాపొలి పట్టుమ్చచి రిసా కి, జో ఒగ్గర్ కామ్ కెర్తయ్.

14 పడ్డో, ప్రేమ జలో డాక్టర్ జలో లూకా చి దేమా తుమ్క జోవయించి ప్రేమ సంగ తెద్రయ్తతి.

15 లవొదికయ పట్టుమ్తెచ బావుడ్లు జల నంపజలసక చి నుమ్పాక, చి జేవ్చి గెరి సబ కెర్తి సంగుమ్చక అంచి ప్రేమ సంగ.

16 పడ్డో, తుమ్తె ఈంజ ఉత్తుమ్ సదు కెర సూనయ్లదు మెలె, లవొదికయ పట్టుమ్తెచ సంగుమ్తె కి సదు కెరవ సూనవ. పడ్డో, జా లవొదికయ పట్టుమ్తె సంగుమ్తె ఆవ్ తెద్రయ్లి ఉత్తుమ్ తూమ్ కి సదు కెర.

17 పడ్డో, 'ప్రబు తుక దిలి కామ్ తుయి నిదానుమ్ తెన్ పూర్తి కెర కుట్టవు' మెన అర్కిప్పుక కి తుమ్ సంగ.

18 ఆవ్ పవులు సొంత ఆతు తెన్ ఈంజ ముద్దు సంగితి ఆకర్ కోడు రెగ్గితసి. ఆవ్ జేలి జలిన్చి రిసా తుమ్ ప్రార్దన కెరుక పచ్చ నాయ్. ప్రబుచి దయ తుమ్చి తెన్ తవును!

§ 4:12 4:12 నెంజెలి 'యేసుక గొత్తి సుదొ రితో జలో', నెంజెలి 'యేసుక గొత్తి రితో జలో'.

**Kupia New Testament**  
**Kupia: Kupia New Testament (New Testament)**

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

---

PDF generated using Haiola and XeLaTeX on 1 Oct 2024 from source files  
dated 29 Jan 2022

7ccb2690-4432-5e86-88c1-f8ee976f30f4